

Kemasukan penuh pelajar IPT Oktober

4 lagi kategori penuntut dibenar pulang ke kampus berperingkat mulai bulan ini

Oleh Syuhada Choo Abdullah, Muhammad Yusri Muzamir dan Nor Azizah Mokhtar
bhnews@bh.com.my

Kuala Lumpur: Pelajar institusi pengajian tinggi (IPT) dibenarkan kembali ke kampus secara berperingkat mulai bulan ini dengan kemasukan sepenuhnya pada Oktober ini.

Menteri Pengajian Tinggi, Datuk Dr Noraini Ahmad, ketika mengumumkan perkara itu, berkata kebenaran berkenaan diperseujui pada Mesyuarat Jemaah Menteri, semalam.

"Empat lagi kategori pelajar akan dibenarkan kembali ke kampus secara berperingkat, mulai bulan ini.

"Kumpulan ini adalah tambahan kepada lima kategori pelajar yang diberi kebenaran sama sebelum ini," katanya pada sidang media di Putrajaya, semalam.

Beliau berkata, empat kategori itu ialah sebanyak 30 peratus pelajar tempatan di IPT swasta (IPTS) seperti dimohon Persatuan Kolej dan Universiti Swasta.

"Kedua, pelajar tahun satu hingga empat di universiti awam (UA) dalam bidang pengajian memerlukan latihan klinikal, latih amal, praktikal, bengkel, makmal, studio atau peralatan khusus serta mereka yang perlu menduduki peperiksaan badan profesional.

"Ketiga, pelajar tahun satu hingga empat di UA yang tiada akses internet atau persekitaran kondusif, seperti ruang belajar yang sempit atau keadaan tidak selesa bagi melaksanakan aktiviti pengajaran dan pembelajaran (PdP) secara dalam talian.

"Satu lagi kategori ialah pelajar antarabangsa di UA dan IPTS, termasuk penuntut baharu," katanya.

Menjelaskan lanjut, Noraini berkata, IPT diberi fleksibiliti dalam menentukan mod pembelajaran bersesuaian, termasuk menerusi PdP secara dalam talian kepada pelajar terbabit mengikut keperluan program masing-masing.

Katanya, keputusan kerajaan membenarkan pembukaan semula IPT itu dibuat atas keprihatinan untuk memastikan pengajian pelajar tidak terjejas. Beliau berkata, aspek pendidi-



Noraini pada sidang media di Putrajaya, semalam. Turut hadir, Timbalannya, Datuk Dr Mansor Othman (kiri) dan Ketua Setiausaha Kementerian, Datuk Seri Dr Mazlan Yusoff. (Foto BERNAMA)

EMPAT LAGI KATEGORI PELAJAR IPT DIBENAR PULANG KE KAMPUS

Kumpulan ini tambahan kepada lima kategori pelajar yang telah diberi kebenaran sebelum ini. Empat kategori pelajar terbabit ialah:

- ▶ Pelajar tempatan di IPTS **sebanyak 30% seperti yang dimohon** oleh persatuan kolej dan universiti swasta
- ▶ Pelajar Tahun Satu, Dua, Tiga dan Empat di UA dalam bidang pengajian yang memerlukan **latihan klinikal, latih amal, praktikal, bengkel, makmal, studio atau peralatan khusus, serta mereka yang perlu menduduki peperiksaan badan profesional**
- ▶ Pelajar Tahun Satu, Dua, Tiga dan Empat di UA yang **tidak mempunyai akses internet atau persekitaran kondusif, seperti ruang belajar yang sempit atau keadaan yang tidak selesa** bagi melaksanakan aktiviti PdP secara dalam talian
- ▶ **Pelajar antarabangsa di kedua-dua UA dan IPTS**, termasuklah pelajar baharu



kan dan kesejahteraan pelajar IPT sebagai aset penting dalam memastikan kelangsungan serta kegemilangan negara pada masa depan, sentiasa menjadi keutamaan Kementerian Pengajian Tinggi (KPT).

"Justeru, saya berharap keputusan ini dapat diterima baik se-

mua pihak," katanya.

Malah, beliau berkata, KPT sudah mengkaji semula kesediaan IPT kembali memulakan operasi sepenuhnya berikutan situasi semasa COVID-19 di Malaysia yang semakin terkawal dan beransur pulih.

Katanya, IPT dan pelajar juga

diminta membuat persediaan sekarang bagi memastikan kemasukan sepenuhnya pada Oktober ini dapat dilaksanakan dengan sempurna.

"KPT berpendapat tempoh hampir tiga bulan yang masih berbaki hingga semester baharu dimulakan pada Oktober ini, adalah mencukupi bagi semua pihak membuat persiapan dan persediaan diperlukan.

"Bagaimanapun, KPT dan IPT prihatin mengenai beberapa masalah mungkin terpaksa dihadapi sebahagian pelajar, terutama berkaitan isu penginapan serta tiket penerbangan untuk kembali ke kampus.

"Justeru, semua usaha dan langkah diperlukan sedang diambil bagi menangani isu itu dan pelajar boleh menghubungi Bahagian Hal Ehwal Pelajar di IPT masing-masing," katanya.

Sementara itu, Noraini berkata, aktiviti pelajar IPT yang kembali ke kampus, adalah dibenarkan dengan syarat tidak melebihi 250 orang tertakluk kepada saiz ruang dan penjarakan sosial.

Beliau berkata, semua aktiviti sukan dan riadah juga perlu mematuhi prosedur operasi standard (SOP) dikeluarkan Kementerian Kesihatan, Majlis Keselamatan Negara serta Kementerian Belia dan Sukan.

"Pelajar yang pulang ke kampus diminta terus mengamalkan penjarakan sosial dan sentiasa menjaga kebersihan diri," katanya sambil menjelaskan SOP serta garis panduan akan dikemas kini bergantung pada arahan pihak berkuasa dari semasa ke semasa.